

# EZ BÊKES O

Burhan Beyazyildirim



1842

EZ BÊKES O  
Burhan Beyazyildirim  
Şiire

EZ BÊKES O

©Burhan Beyazyildirim

Çape: Berdan Matbaacılık  
Davutpaşa Cad. Güven Sanayi Sitesi, C Blok.  
No: 239 Topkapı/İstanbul  
Tel: (0212) 613 12 11

Edîtor: Ali Aydın Çiçek  
Mîzanpaj: Ali Aydın Çiçek  
Xebata Qapaxî: Minife Yıldızhan  
ISBN: 978-605-66071-0-3


Adrese: Tuzlu Köyü Varto/Muş  
Tel: 0(507)9594412

1952

# EZ BÊKES O

**Burhan Beyazyildirim**

**Şiire**



## TEDEYÎ

EZ BÊKES O.....	9
MI RÊ CA ÇÎN O.....	10
VINDE DILO.....	11
MI RÊ YAR BE.....	12
DERMANÊ BIRÎNA MI.....	13
SEBENOYANÎ.....	14
ROJA MI SÎYA WA.....	15
KAMÎRÊ MENDO.....	16
DESTÊ MI KE.....	17
EZ BÎRINDAR O.....	18
XO DEST DE.....	19
EWRO ZERÊ MI VEŞENO.....	20
SE BENO.....	21
BÊDERMANA.....	22

ROJA TARIËYE.....	23
DERD Û ÇÏLE.....	24
GULE.....	25
ÇARE ÇÏN O.....	26
NÊZANO.....	27
RAYE GURETA.....	29
HALÊ MI PERS KE.....	30
BIHUYÎ.....	31
MEBERBÎ.....	32
YAXÊ MI RAVERDE.....	33
TIBÎRINDAR.....	34
MERHABA.....	36
FÎNA BERBIŞ.....	37
BÎRINDAR O.....	38
MI DE CÊRENO.....	40
WELATO XERÎB.....	41
BEDENÊ MI.....	42
DEWRAN TO RÊ KÎ NÊMANENO.....	43
ÊNÊ WAR.....	44
NÊBENÊ.....	46
NÊVÎNENA.....	47
UŞTO RA.....	48
BÎYA LETE.....	50
BÎRINA MIYAKERÊ.....	51
TI ZANENA.....	53
ZONÊ MA RA.....	54
HEVAL BONE.....	55



MA RA BIRÎYÊ.....	57
ÇÊ BARKERDO.....	58
EMRÊ MI DERBAZ BENO.....	59
BES O.....	60
KOYÊ BÎNGOLÎ.....	61
DEWRAN.....	62
GONÎ ŞORO.....	63
ZERYA MI.....	64
ÇARE.....	65
XIZIR HEVAL BONE.....	66
BÊTO DÎNA MI TARÎYA.....	67
TO RA NÊVANO.....	68
HEWN ÇIMANÊ MI NÊKUNO.....	69
AXA MI.....	70
BOYA WELATÎ.....	71
ZERÊ MI VEŞENO.....	72

**Burhan Beyazyildirim**, Serra 1964 Gimgim de, dewa Gadiza de ameyo dinya. Mektebo verên û mîyanên dewe de wend. Lîse Çewlîg de wende. Serra 1985 unîversîte qezanc kerde labelê semedanê ekonomî ra nêşî unîversîte. Zewjîyayî yo û wayîrê di kênekan o. 1984 ra no het şîran nusneno. Xeylê şîrê ey kovara Vateyî de weşanîyayê. Nika dewa Gadiza de emrê xo rameno.

## EZ BÊKES O

Gule bê ma şîme serê îneyê Xizirî  
Ez biberbî dê (ey) ra mirad bijerî  
Na axa xo bê dê kamî ra vajîrî  
Ez bêkes o, mi nîya vileçewt meke

Verê dewa to raşte wo, merg a  
Bejna xezala mi zê dare derg a  
Ti ke hes nêkana mi bide verga  
Ez teyna wo, mi nîya vileçewt meke

Zerê mi vêşeno bîyo zê adir  
Şew û roj berbeno kamaxo qeder  
Miradê ma keno îşala Xizir  
Ez feqîr o mi nîya vileçewt meke

Bî çend serrî Burhan to dime vano  
Devran êno şono naye rind zano  
Ti ke biwazene emrê xo dano  
Ez xerîb o mi nîya vileçewt meke

*10.02.1984/Gadiza*

## MI RÊ CA ÇÎN O

Roj birnê yara mi nê roja benê  
Vanê çarşeme de veyvê xo kenê  
Nê xedara qeyî guna mi cênê  
Dîna bîya tengê mi rê ca çîn o

Mi va bê meberbe derdê to bes o  
Ez hande dîna de jûyo bêkes o  
Canê min o to werd bêbext o  
Dîna bîya tengê mi rê ca çîn o

Burhano bêkes o, gula dê berda  
Zerê mi veşeno ez werdo derda  
Qederê zalimî naj be mi kerda  
Dîna bîya tengê mi rê ca çîn o

*16.08.1985/Gadiza*

## VINDE DILO

Derdê mi oncî bîyê têra  
Sewda yarê çiqa zor a  
Aqil werdo cêro kora  
Vinde dilo zalim dilo

Derdî zaf ê, çîn o çare  
Dîna ma rê bîya ware  
Melema mi nazika yare  
Vinde dilo zalim dilo

Burhan vano zerê mi vêşa  
Zerê mi derdo, kanê neşe  
Hes kena bê mi bikîşe  
Vinde dilo zalim dilo

*20.09.1986/Muska*

## MI RÊ YAR BE

Derdê mi, çarê mi ti ya gula mi  
Ez to ra hes keno derdo kula mi  
To rê se bî gula eşq û zerê mi  
Ez to rê vêşeno, ti mi rê yar be

Yara mi dûr menda ez se bivînî  
Îstîrê çimanê mi şonê zê îni  
Zerê mi de zafê kul û bîrinî  
Ez to rê vêşeno, ti mi rê yar be

Burhanî dîna de roje nêdîya  
Xora nêhuno, gureto sîya  
Se beno qelbê xo mi rê bije bîya  
Ez to rê vêşeno ti mi rê yar be

*05.06.1988/Kocaelî*

## DERMANÊ BIRÎNA MI

Delala mi zaf rindek a  
A dîna de ju ya, tek a  
Nêzdî meberê gunek a  
Dermanê bîrina mi a wa

A gula mi, ez maşiq o  
Nazika yare, aşiq o  
Dilo pişkê mi yaniq o  
Dermanê bîrina mi a wa

Burhan nîya to ra cêreno  
Zê gula usarî vêreno  
Bimirî to ra nêvêreno  
Dermanê bîrina mi a wa

*07.06.1988/Kocaelî*

## SE BENO YANÎ

Gelê dosta birîndar o naleno  
Xem û kedera ra hondê kaleno  
Hal mi ra aseno ez be xo zano  
Rey mi ser de bêrê se beno yanî

Bîrina mi rê derman esto dosta de  
Yare rê kole bî verê desta de  
Mi zî cayê xo guret ortê mesta de  
Rey mi ser de bêrê se beno yanî

Burhan hawar keno yar û dosta rê  
Bizanê ke dîna ware wa ma rê  
Çixa bîrindar o, bîya bêçare  
Rey mi ser de bêrê se beno yanî

*08.09.1988/Gadiza*



## ROJA MI SÎYA WA

Kul û bîrina ra zerê mi vêşeno  
Pişkê mi pojî yê, ez gur naleno  
Dozê mi Xizir der o, coka kaleno  
Cara nêhuno ke roja mi sîya wa

Îstîrê çimanê mî zê îni şîyo  
Hewal û hogirî halê mi dîyo  
Ez be xo zaneno çî be mi bîyo  
Cara nêhuno ke roja mi sîya wa

No derd mi de hetanî merdene êno  
Heta weş bî ez se xo vîr ra keno  
Roja mi sipe bo, nêzo se beno  
Cara nêhuno ke roja mi sîya wa

Burhan dawadar o, wekîlê mi Xizir  
Bîrina mi rê melem bivîno hazir  
Ez koleyê ti yo Xizir o nazir  
Cara nêhuno ke roja mi sîya wa

19.12.1988/Gadiza

## KAMÎ RÊ MENDO

Dewran êno şono zê sîya dare  
Tewr kesî rê nêmaneno çîn o çare  
Koyê ma ra her roj varena vare  
Kamî dewran ramit kamî rê mendo

Derd û kulî zaf ê, zerê mi pîrr o  
Zerê mi vêşeno qelbê mi adir o  
Ez ke nêbî kamo nê derda buro  
Kamî dewran ramit kamî rê mendo

Burhan vilê to şikito nê derda  
Dîyax bike hela hetanî merda  
Serê xo bijerî şorî kot ser de  
Kamî dewran ramit kamî rê mendo

*30.06.1989 /Xaruke*

## DESTÊ MI KE

No çi halo lê lê yarê  
Oncî bela amo ma rê  
Şewe ama, bîyo tarî  
Bê destê xo destê mi ke

Îstîra ma zê îni ya  
Bîrina ma zaf xorî ya  
Ti kî zê mi bêçarê ya  
Bê destê xo destê mi ke

Zerê ma ra şona gonî  
Dermanê derdê ma kanê  
Ez bê to mireno cane  
Bê destê xo destê mi ke

Burhan îta bêomid o  
Ti durî ya, destê xo to do  
Xiziro kal roje bido  
Bê destê xo destê mi ke

## EZ BÎRINDAR O

Lê lê gule ti zaf kewta mi vîrî  
Ortê ma de raw û rêçî bîyê dûrî  
Çimanê mi ro rişînê îstîrî  
Zerê mi veşeno, ez bîrindar o

Tî rindeka zê gula verê vare  
Şewk dana zê na aşme û astare  
Ez nêweş o, ti mi rê bibe çare  
Zerê mi veşeno, ez bîrindar o

Ewro serê mi ra mij û duman o  
Ge berbeno ge zîbeno-naleno  
Zê vareka verê mîye kaleno  
Zerê mi veşeno, ez bîrindar o

No Burhano feqîr bîyo derbeder  
Mi ser ra nêsono no derdo keder  
Gencîye ame şîye bîye heder  
Zerê mi veşeno ez bîrindar o

*28.03.1990/Ankara*

## XO DEST DE

Kula bîrinê mi melem nêcênê  
Derdî serê mi ra zê mij cêrenê  
Kotî mi bivînê uja pêcênê  
Ez se meberbîne halê xo dest de

Bîyo kor û kotî, dermanê mi çîn o  
Qey dermanê derde mi çîn o?  
Destê talê xo ra emanê mi çîn o  
Ez se meberbîne halê xo dest de

No zulim, no tofan mi rê bes nîyo?  
Kes nêzano mi dîna de çî dîyo  
Mi xo kerdo vîndî, hêşê mi şîyo  
Ez se me berbîne halê xo dest de

Burhan vano no qaro giran bes o  
Omidê mi çîn o, timî bêkes o  
Roja mi tarî ya, talê mi pîs o  
Ez se me berbîne halê xo dest de

*23.09.1990/Ankara*

## EWRO ZERÊ MI VEŞENO

Ti kotî ya gula m' gula m'  
Weş nêbeno kulam' kula m'  
To rê beno xulam xulam  
Ewro zerê mi veşeno

Ti kotî ya, to bivînî  
Bê to dejenê bîrinî  
Îstîrê mi şonê zê îni  
Ewro zerê mi veşeno

Ti kotî ya lêlê yare  
Koyê ma ra vara vare  
Kamax dîna ebê dora  
Ewro zerê mi veşeno

Ti kotî ya, kotî cêrena  
Heşê mi mi ra tirena  
Rojê Burhanî kişena  
Ewro zerê mi veşeno

*03.10.1991/Muska*

## SE BENO

Talê mi xirab o, roja mi sîya wa  
Îndî se bikerî bextê mi no wo  
Destê roja xo ra kewtone rawo  
Nêzo no halê mi îndî se beno

Mi va roje nihuno her roj berbeno  
Mi ra roja rinde durî erzeno  
Çarê mi nêmendo canê 'm lerzeno  
Nêzo no halê mi îndî se beno

Kamta şîya uja raya m' birîye  
Dîna bêbexte de roje nêdîye  
Zerê mi xirab o, ez se bihuyî  
Her ca tarî yo, coka berbeno

Namê mi Burhan o, derdê mi zaf o  
Kula bîrina dest mireno, maf o  
Vinde ez kî dewran biramî defe  
Zerê mi vêşeno coka naleno

*05.12.1991/Îzmîr*

## BÊDERMANA

Kam de gerre keno kula zerê xo  
Ewro kî, meşte kî ti bêderman a  
Xizir to berzone bine perê xo  
Ewro kî, meşte kî ti bêderman a

Nêzano ez genc o, nêzano kal o  
Kam ra pers bikerî ma no çi hâl o  
Talê mi nêverdano bêzon o, lal o  
Bîrina mi dejena xêlî zeman o

Burhano ax keno, bîrina xo kul a  
Dîna mi rê telî, şarî rê gul a  
To ez kerdo xêxê fiştone çola  
Sala no talê mi kamax bimano

*03.02.1992/İzmir*



## ROJA TARÎYE

Xizir Baba ez meymanê ti yane  
Gurbete de ez bêderman bîyone  
Koçê xo gureto îtara şîyane  
Ya Xizir ma mede roja tarîye

Ez û dost Xidirî lê to der îme  
Bira ewro zaf veşeno zerê mi  
Raya to ra qurban beno serê mi  
Ya Xizir ma mede roja tarîye

Ewro serê to ra reşto dostê xo  
Bîrindar o, ci ra vano halê xo  
Hevale to to keno şans û talê xo  
Ya Xizir ma mede roja tarîye

Burhan vano Xidir ez amo lê to  
Zerê mi veşeno Îzmîr de bê to  
Ti mi ra xerîb a, ez to ra dot o  
Ya Xizir ma mede roja tarîye

16.08.1992/Muska

## DERD Û ÇÎLE

Kamta şîya mi de ame  
Talo xirab, derdo çîle  
Damîş nêbeno canê mi  
Tal û xirab, derd û çîle

Dîna bebext a, zalim a  
Nêzo se beno halê ma  
Endî bihuyo talê ma  
Tal û xirab, derd û çîle

Burhan vano akesîno  
Bîrindar o, çarê mi çîn o  
Kam ke lom keno bivîno  
Tal û xirab, derd û çîle

*24.12.1992/Yataxan-Muxla*

## GULE

Gule ez to ra dûrî menda  
Bê destê xo bide mi dest  
Ti kotî ya rew bî endî  
Bê destê xo bide mi dest

Seba nonê kewtâ çola  
Bizane ke no çi hal o  
Ez bilbil o, ti kî gul a  
Bê destê xo bide mi dest

Burhan vano ti goş serne  
Dûrî mevinde bê ma şîme  
Gule û bilbilê jubîn bîme  
Bê destê xo bide mi dest

*27.12.1992/Yataxan-Muxla*

## ÇARE ÇÎN O

Bîrina mi bîya teze  
Melem çîn o, çare çîn o  
Ez qey nê derdê xo vajî  
Melem çîn o, çare çîn o

Zerê derd de kotî bîya  
Na dîna de mi çî dîyo  
Emegê mi boşa şîyo  
Melem çîn o, çare çîn o

Ti berbena xerîb Burhan  
Derdê to nêzanê însanî  
No çî derd o, çîn o derman  
Melem çîn o, çare çîn o

*29.03.1993/Mersîn*

## NÊZANO

Ewro zerê mi veşeno  
Qelbê mi kul û bîrino  
Derd û xem mi rê şîrin o  
Vano vano xo rê vano  
Kes nê derdê mi nêzano

Derdî zaf ê, bê hesab ê  
Verê mi de zê kitab ê  
Hela qaytê nê qesab ê  
Vano vano xo rê vano  
Kes nê derdê mi nêzano

Qaytê min û nê talî kerê  
Se bikerî, komta şorî  
Her hetê ra bîyo tarî  
Vano vano xo rê vano  
Kes nê derdê mi nêzano

Burhan vano yamano hal  
Derd û kula ez kerdo kal  
Destê mi de nêmando mal  
Vano vano xo rê vano  
Kes nê derdê mi nêzano

*12.11.1994/Muska*

## RAYE GURETA

Kewtîme raya lete none dima  
Nêzana felekî raye gureta  
Xizir Baba ti sîye ke ma ser ra  
Nêzana felekî raye gureta

Ma ponc heval îme, ewro rewîme  
Felek ma ra durî şo tern û nêwîme  
Xizir nêwaşt ma be na halî bimrîme  
Ma nêzana talî raye gureta

Kewtî oxirê ma di teyrê gewrî  
Serê ma gureto dumanî, hewrî  
Ma nêzana se bî, se rew bî tarî  
Ma nêzana bextî raye gureta

Burhan bîrindar o, teba hewalo  
No talê ma bîya kewtîme nê hala  
Xiziro Kal ma de bo sala  
Ma nêzana qeder raye gureta

*16.03.1995/Adana*

## HALÊ MI PERS KE

Mi rê tenge ama destê mi bije  
Ti kotî ya zalim bê halê mi pers ke  
Omidê mi birî yo, mi nêdîya roje  
Ti kotî ya zalim bê halê mi pers ke

To ra zalim oncî ti nas kerda  
Qarê to ra nala kewto nê derda  
Ez kam ra se vajî mi be xo kerda  
Ti kotî ya bêbext bê halê mi pers ke

Burhan va meşikne perranê mi  
To dest de lerzeno cîger û canê mi  
Mi ra nêvisîno talê mi, bextê mi  
Ti kotî ya xayîn bê halê mi pers ke

*21.03.1995/Adana*



## BIHUYÎ

Mi xêre nêdîya na dîna de  
Kardîya xo bîje zerê mi ra de  
No dewranê to yo, wa ti xo tade  
Nêzano biberbî, nêzano bihuyî

Ez rebeno roj û talê xo dest de  
Na bêbext dîna de derdê mi estê  
Bêderman mendone, ez bîyo meste  
Nêzano biberbî, nêzano bihuyî

Burhan vano halê mi se beno yare  
Omidê mi nêmendo, bîyo bêçare  
Qetlê mi bivejê berzeno dare  
Nêzano biberbî, nêzano bihuyî

*14.04.1995/Adana*

## MEBERBÎ

Dewranê mi çep cêreno  
Ez se meberbî se meberbî  
Ne beno weş ne mireno  
Ez se meberbî se meberbî

Jandanê kul û bîrinî  
Îstîre mi şonê zê îni  
Na dîna de çi bivînî  
Ez se meberbî se meberbî

Kam se vano vajo mi ra  
Zerê xo nêcêno ci ra  
Derdî mi rê bîyê bira  
Ez se meberbî se meberbî

Burhan tîje şona kora  
Kam se vano vajo to ra  
Çila to kî şona xow ra  
Ez se meberbî se meberbî

*15.06.1995/Gadiza*

## YAXÊ MI RAVERDE

Emrê mi derbaz bî, xelasîya  
Mi roje nêdîye cêreno nîya  
Talê min o xedar mi der o  
Bes o endî qeder yaxê mi raverde

Vilê mi şikito qotika derda  
Mi kotî ra mirad waşt talê nêverda  
Roj be roj derd êno nê derdî serde  
Bes o endî talê yaxê mi raverde

Burhan bîrindar o coka naleno  
Zerê xo veşeno ewro kaleno  
Qelbê mi derd û kula rê zê halêno  
Bes o endî bexto yaxê mi raverde

*02.09.1995/Îzmîr*

## TI BÎRINDAR

Bê ma pîya biberbîme  
Ez bîrindar ti bîrindar  
Ma be nê halî se benîme  
Ez bîrindar ti bîrindar

Derd û kulî ênê ma rê  
Koyê ma ra vara vara  
Bêtamul o ez, bêçare  
Ez bîrindar ti bîrindar

Yara mi ti zaf kalena  
Bîrindar a, kûr nalena  
Nêzo se beno halê ma  
Ez bîrindar ti bîrindar

Ez waneno halê xo rê  
Çare çîn o derdê to rê  
Derdê dîna çixa zor ê  
Ez bîrindar ti bîrindar

Burhan vano talê xo rê  
Nîya berbeno halê xo rê  
Duwa keno gula xo rê  
Ez bîrindar ti bîrindar

*07.06.1996/Gadiza*

## MERHABA

Ez ewro meymana to rê  
Merhaba Koyê Bîngolî  
To de derman dîyo xo rê  
Merhaba Koyê Bîngolî

To ma ra berza cor ra  
Payîz amo vare vara  
Qeyî miradîyo ma ra  
Meraba Koyê Bîngolî

Ewro verba to oncîyo  
Ti kê zana mi çi dîyo  
Xatir be to ez rewîyo  
Eywalla Koyê Bîngolî

*19.10.1996/Koyê Bîngolî*

## FÎNA BERBIŞ

Ez bîyone meymanê to  
Ti qey mi fîna berbiş  
Mi va bibî dermanê to  
Ti qey mi fîna berbiş

Dîna xo ser ra kerda tarî  
Miradîna seba şarî  
Zehêr kena ro zê marî  
Ti qey mi fîna berbiş

Dima tenge hîratî ya  
Ti nefile miradî ya  
Tamulê mi xelasîya  
Ti qey mi fîna berbiş

Burhan vano zulim meke  
De ti bê qese sere ke  
Halê mi bizanê gereke  
Ti qey mi fîna berbiş

*27.06.1997/Muska*

## BÎRINDAR O

Derdê to zerê mi poyno  
Bîrindar o bîrindar o  
Feleko kor xo bipoyno  
Bîrindar o bîrindar o

Zerê mi bî pirrê kula  
Bîyo xêx kewto çola  
Ma ra dûr nêkuno bela  
Ax û zar o, ax û zar o

To rê kor bî, to rê bimirî  
Zelulîya to rê se memirî  
Derdê xo vajîne kamî rî  
Întîzar o, întîzar o

Zerê mi zê vergo haro  
Bêtamulo ez, bêçare wo  
Dormê to kemer o, dar o  
Veremdar o, veremdar o



Meymanê to her ca ra yê  
Tayê dost ê, tayê bira yê  
Amê bîyê top to ser ra yê  
Bîrindar o bîrindar o

To ser ra şînuşîwan o  
Berbenê vanê meyman o  
Çimê mi pirrê îstîran o  
Ax û zar o, ax û zar o

Cirano virašto çê to  
Top bîyê amê leyê to  
Ez dîyax nêkeno bê to  
Întîzar o, întîzar o  
Burhan vano no çi hal o  
Wa derdê to rê binalo  
Heta weş bî mi rê kul o  
Veremdar o veremdar o

*27.11.1997/Mersîn*

## MI DE CÊRENO

Yaxê mi raverde talo xirab  
Kata şîyo ti kî mi de cêrena  
Nê verdana roje bivînî mirad  
Kata şîyo ti kî mi de cêrena

Zerê mi vêşeno adir o, sur o  
Cano bêkes derda heta key buro  
Tivanê talê mi mewran o, mur o  
Kata şîyo ti kî mi de cêrena

Burhan naleno feqîr û bêçare  
Xebetîno, ser ra varena vare  
Mi nêzana to rê çî mende kare  
Kata şîyo ti kî mi de cêrena

*25.10.2001/Kazan-Tatarîstan*

## WELATO XERÎB

Xerîbîye kar kerdo canê mi de  
Xurbete de bêkes-bêkû gêreno.  
Qol felek ti çerxê xo tade  
Xurbete de bêkes-bêkû gêreno.

Ewro serê mi ra mij û dûman o  
Welato xerîb o, halê mi yeman o  
Welat ra vejîyo xeylê zeman o  
Xurbete de bêkes-bêkû gêreno.

Kewtê mi vîrî gula mi, domanî  
Kulê xo rê se bivînî dermanî?  
Hela vinde tayêde bîn bimanî  
Xurbete de bêkes-bêkû gêreno.

Vaje Burhan, veje halê xo ser a  
Dewran êno-şono sey sîya dara  
Pers ke, talîh çî wazeno ma ra  
Xurbete de bêkes-bêkû gêreno.

*15.11.2001- Kazan/Tatarîstan*

## BEDENÊ MI

Qar û cefayê na dîna  
Helesna ro bedenê mi  
Awa ke ebe mi bîya  
Helesna ro bedenê mi

Roje roje ra tarî ya  
Roja mi nîya ê şarî ya  
Roje mi ra miradî ya  
Helesna ro bedenê mi

Mi va dewran mi de bêro  
Gul û çîçegê mi nêvêro  
Mi fîno be berbiş he' ro'  
Helesna ro bedenê mi

Talê min o serserî yo  
Burhan dest de bêçarî yo  
Kata qayt keno tarî yo  
Helesna ro bedenê mi

*18.11.2001/Kazan Tatarîstan*

## DEWRAN TO RÊ KÎ NÊMANENO

To mi ser ra kerdo tarî  
Dewran to rê kî nêmaneno  
Ti bîya sey heşê harî  
Dewran to rê kî nêmaneno

Timî nîya şewe nîya  
Dimayê tenge, hîratî ya  
Darû û derman xelisîya  
Dewran to rê kî nêmaneno

Yazix eşq û sewda mi rê  
Mi nafiye wendo to rê  
To bîya xêxe, bîya kore  
Dewran to rê kî nêmaneno

Burhanî va: Derdî ser ra derd  
Bes o êdî, to canê mi werd  
Kamî ra vajî? Mi bi xo kerd.  
Dewran to rê kî nêmaneno

11.05.2003/Îzmîr

## ÊNÊ WAR

Mi va zerê mi kul-bîrin o  
Îstîr çima ra ênê war  
Her ca ra omid birîno  
Îstîr çima ra ênê war

Vilê mi şikîyo verê mi  
Jan dano, kulo zerê mi  
Derdo bêlawo serê mi  
Îstîr çima ra ênê war

Perr û qanatî çîn ê mi ra  
Kederîya mi de gura  
Çê mi veşna bêbext mura  
Îstîr çima ra ênê war

Vay şanito halênê mi  
Ardo war texto payê mi  
Dîna de çîn o cayê mi  
Îstîr çima ra ênê war

Se cakerî ez derdê xo  
Burhan nêzanê zerê to  
Qey raşt nêbeno serê to  
Îstîr çima ra ênê war

*13.05.2003/Îzmîr*

## NÊBENÊ

Na aşme ra ez berbeno  
Îstîrê mi zuq nêbenê  
Çima verde heder beno  
Îstîrê mi zuq nêbenê

Ma veşno çê xo be adir  
Heq ma ra gureto sebir  
Dîna xo rê kerde zehêr  
Îstîrê mi zuq nêbenê

Ma ser ra puk û duman o  
Bîrindar o, hal yaman o  
Sala murarê nêmano  
Îstîrê mi zuq nêbenê

Burhan emrê to qedîya  
Can û beden helesîya  
Omidê mi xelesîya  
Îstîrê mi zuq nêbenê

*11.06.2003/Muska*



## NÊVÎNENA

Ti kamax bê dîna dîna  
Mi rê raye nêvînena  
Mi to de roje nêdîya  
Mi rê raye nêvînena

Bext û tale bîyo nêyar  
Mi derdê xo kerdo hewar  
Ez to dest de bîyo bêzar  
Mi rê raye nêvînena

Mi ser ra şew a, tarî yo  
Talê mi nîyo ê şarî yo  
Her het mi ra miradî yo  
Mi rê raye nêvînena

Burhanî çî dî dîna de  
Roja xo berbişo sade  
Çêberê yake nê ca de  
Mi rê raye nêvînena

*19.06.2003/Muska*

## UŞTO RA

Koyê Bîngolî ewro delal û weş o  
Serê mi ra mij û duman uşto ra  
Bîrinî melem benê, kulî benê weşî  
Serê mi ra mij û duman uşto ra

Ez û hevala xo cêrenîme ser ra  
Ti weş a, şîrin a, mird nibîyo to ra  
Kox û Sêlereşe eşq guret ma ra  
Serê mi ra mij û duman uşto ra

Ez û gule serê to ra meyman îme  
Ma pîya cêrenîme, to de heval îme  
Halê ma ke nîya bo ma nîya delal îme  
Serê mi ra mij û duman uşto ra

Koxe, Sêlereşe, Gulbeg, Elmurad  
Sala Xizir ma mekerone bêmirad  
Tâlê ma wo kamax bibone merat  
Serê mi ra mij û duman uşto ra

Burhan vano: Yare destê xo bide  
Bejna to nazik a, qelbê xo mi de  
Ya Xizir ti roje û tecele ma de  
Serê mi ra mij û duman uşto ra

*20.07.2003/Koyê Bîngolî*

## BÎYA LETE

Xeylê zemanî bîrindar o  
Cîgera mi bîya lete  
Mi roje nê dîya, çar o  
Cîgera mi bîya lete

Punik-pergal bîyo vila  
Weş nêbeno bîrina m' kul a  
Permeliyo ez zê gula  
Cîgera mi bîya lete

Derguşê mi bêsitâr ê  
Bêwayîr ê, zaf bêçare yê  
Kes nêzani se bî ma rê  
Cîgera mi bîya lete

Burhan roja mi senê roja  
Dergûşê mi mendê uja  
Ez şima ra dûrî yo naja  
Cîgera mi bîya lete

*02.08.2003/Muska*

## **BÎRINA MI YAKERÊ**

Derd û kula xo rê melem nêdîyo  
Mi roje nêdîya emrê mi qedîyo  
Ruyê mi nêhuno ez bêmirad bîyo  
Heval berê serê bîrina mi yakerê  
Îstîrê mi şonê bijê pak kerê

Gureto mi ser ra bela û derdo  
Nêno ontene ez dest de merdo  
Nê talê bebextî ez verem kerdo  
Heval berê serê bîrina mi yakerê  
Îstîrê mi şonê bijê pak kerê

Xiziro kal halê mi to ra aseno  
Tawa mi rê bext û talê nîyaseno  
Kula zerê xo rê melem wazeno  
Heval berê serê bîrina mi yakerê  
Îstîrê mi şonê bijê pak kerê

Bîrin fek kenê ya hekîmê mi kanê  
Derdî timî meymanê man ê  
Burhan vano heval halê mi bizanê  
Heval berê serê bîrina mi yakerê  
Îstîrê mi şonê bijê pak kerê

*15.08.2003/Muska*

## TI ZANENA

Koyê ma wo, weş û delal  
Ewro ma de bîyo heval  
Axwe şona serdin-zelal  
Zerê ma ra ti zanena

Cêro êna sura serda  
Ma cêrenîme wara ver de  
Ma wela to keke kerde  
Zerê ma ra ti zanena

Ti Bîngol a, hazar gol a  
Çêyî ke şî îsîz a, çol a  
Ti gul a, ma rê bilbil a  
Zerê ma ra ti zanena

Burhan vano ware weş o  
Ez eşqê yare de veşo  
Birayê mi Xidir niweş o  
Zerê ma ra ti zanena

*02.08.2004/Koyê Bîngolî*

## ZONÊ MA RA

No welat welatê ma wo  
Kilît menê zonê ma ra  
No milet miletê ma wo  
Kilît menê zonê ma ra

Ko û deştî cayê ma yê  
Kulî way û mayê ma yê  
Ê pî û birayê ma yê  
Kilît menê zonê ma ra

Kam halê welatî zano  
Kam şono derdê dê vano  
No milet miletê ma wo  
Kilît menê zonê ma ra

Burhan ozan o, Gimgim ra  
O kî zano na tele ra  
Hela qayt ke rê halê ma ra  
Kilît menê zonê ma ra

*07.08.2004/Gadiza*



## HEVAL BONE

Gula mi ti tenge der a  
Xizir to de heval bone  
Nêweş a, ebe keder a  
Xizir to de heval bone

Ewro kewta bînê kardî  
Mi seat û deqî mardî  
Kesî mi rê xebere nîyarde  
Xizir to de heval bone

Kul û bîrinê to jandanê  
Bêhewn manena şandanê  
Dûr a, se bijî destê cane  
Xizir to de heval bone

Doxtor derzeno kulê to  
Dîna de zaf o çîlê to  
Rojê benê ya gulê to  
Xizir to de heval bone

Burhan yara mi zê gula  
Bîrîndar a, dil be kul a  
A gul a, to rê bilbil a  
Xizir to de heval bone

*26.10.2004/Înîyê Xizirî*

## MA RA BIRÎYÊ

Vare vara puk o, serd o  
Ray û rêçî ma ra birîyê  
Derd û kula zerê mi werdo  
Ray û rêçî ma ra birîyê

Ez kotî yo, ti kotî ya  
Min û to ma roje nêdîya  
Mi xeyala xo de ti dîya  
Ray û rêçî ma ra birîyê

Ez wazeno berî lê to  
Bîna mi nêna îta bê to  
Bibîyêne meymanê çê to  
Ray û rêçî ma ra birîyê

Seve ti Seva Burhanî  
Nata bê lewê toranî  
Roje bido ma Çilkanî  
Ray û rêçî ma ra birîyê

27.11.2004/Çê Masîya

## ÇÊ BARKERDO

Soz û bextê ma nîya nêbî  
To qey bê ma çê barkerdo  
Hevalê mi ternoteze bî  
Ê qey bê ma çê bar kerdo

Kanê ma şîyêne ware  
Pelo qewe rişna dare  
Felek ma kerdîme pare  
To qey bê ma çê bar kerdo

Dem û dewran pîya nêbî  
No şîyayîş nîya nêbî  
Hona waxtê çêya nêbî  
To qey bê ma çê bar kerdo

No dîna zalim a, mur a  
Bîrina to xedar a, kur a  
To Burhan ra vatêne bira  
To qey bê ma çê bar kerdo

*16.07.2005/Gadiza*

## EMRÊ MI DERBAZ BENO

Kes çîn o ke bêro mi ra pers kero  
Dest berzo ci serê bîrna mi yakero  
Qelbê xo bido mi mi ra hes kero  
Emrê mi derbaz beno şono tal be tal

Ju yare nêdîye zerrîya xo ci dî  
Doçikê dewranî verba xo tadî  
Wazeno çêberê xirabe ca dî  
Emrê mi derbaz beno şono bê heval

Dest erzeno kotî beno xirabe  
Tal û xirab endî mi ra cira be  
Ti vanê şîrîg o, bes o cêra be  
Emrê mi êno-şono bê yar, bê heval

Mi ra vanê Burhan bê urt, bê ware  
Usarî mi ser ra bena zerd dare  
Mi rê heval bone ju rindek yare  
Emrê mi xelesîno şono tal be tal

*07.04.2006/Milas Muxla*

## BES O

Ti kamax bê dîna mi rê xedar a  
Bonçe yaxê mi ra destê xo bes o  
Çê mi veşna, ard war, mendo teber a  
Bonçe yaxê mi ra destê xo bes o

Emrê mi xelesîya rojê nêhuyo  
Qedîyo zê çîla, şayîyo şîyo  
Ti xedar a mi to dest de çî dîyo  
Bonçe yaxê mi ra destê xo bes o

Dîna alem huno, kêfê xo ca de  
To dest de hesîr o, çerxê xo tade  
Ram bike ti mi rê çêberê yade  
Bonçe yaxê mi ra destê xo bes o

Burhan vano rojê serê mi wena  
Zê nê vergê harî mi cêna bena  
Emrê mi ke xelesîya se kena  
Bonçe yaxê mi ra destê xo bes o

*18.02.2008/Gadiza*

## KOYÊ BÎNGOLÎ

Ti vana meyman nêdîyê  
Ma rê verga Koyê Bîngolî  
Meymana barkerdo şîyê  
Ma rê verga Koyê Bîngolî

Ti ma de heval nêbena  
Ma şîme teyna se bena  
Qey bîya har, ti se kena  
Ma rê verga Koyê Bîngolî

Ma waşt to de keyf bikerîme  
Qar û qotik def bikerîme  
Havalîye zaf bikerîme  
Ma rê verga Koyê Bîngolî

Burhan Xidirî de heval o  
Bê kar o, ne selx o ne mal o  
Wa o kî zê ma binalo  
Ma rê verga Koyê Bîngolî

*28.07.2008/Koyê Bîngolî*

## DEWRAN

Ti vana kes zaneno  
Na bêkesîya to ra  
Timî teyna maneno  
Dano zanîyê xo ra

Çêber kulî cadayê  
Doçikê dewranî tadaye  
Mi nêdî rastî tayê  
Dano zanîyê xo ra

Ne heval a ne yar a  
Ne way a ne may a  
Durî mendo yare ra  
Dano zanîyê xo ra

Burhan teyna verdo  
Mi be kam se kerdo  
Vêşo, helîyo, merdo  
Dano zanîyê xo ra

*22 12 2008/Gadiza*



## GONÎ ŞORO

Kardîye bide bîrina mi ra  
Ci ra cenge gonîye şoro  
Cîgera mi bike cira  
Ci ra cenge gonîye şoro

Biray pîya rê, pîya berbenê  
Bîrindar ê, bîya berbenê  
Ma rê nêzdî bo merdenê  
Ma ra cenge gonîye şoro

Burhan kuno, Xidir vano  
Di rojî yo mi rê meyman o  
Ez axa dê o kî axa mi zano  
Ma ra cenge gonîye şoro

*01.05.2010/Gadiza*

## ZERYA MI

No çend serrî yo ez dima to cêreno  
Ti kotî ya, zerya mi veşa-helîya  
Payîz amo ez zê gule vêreno  
Ti kotî ya, zerya mi veşa-helîya

Ne usar bî ne amnan bî, germ bî  
Mi zerre kerde kamî bêşewqet-bêşer bî  
Ez xapita zano, no mi rê jan bî  
Ti kotî ya, zerya mi veşa-helîya

Nêzano ti rojê raşte mi bena  
Vilê mi kena raşt, qedrê mi kena  
Bêkesîye zor a, emre mi wena  
Ti kotî ya, zerya mi veşa-helîya

Burhan vano çimê mi raya to der o  
Teyna mendo zerê tenga xo der o  
Vare vara, rayî birîyê, ko der o  
Ti kotî ya, zerya mi veşa-helîya

*01.02.2012/Gadiza*

## ÇARE

Mi va bilornî kilame  
Tede namê yare bibo  
Gul û sosinî melemê  
Zerya mi tey pare bibo

Bê sênê sisî mi rê yake  
Na zerya mi tede cake  
Be çîta xo çimê mi pake  
Wa cila mi ware bone

Na serre zî derbaz bîye  
Cêro mi yare nêdîye  
Nêzo se bî, kamta şîye  
Zerya mi rê çare bone

Ruyê xo bota meqarne  
Meke, Burhanî meqarne  
Çima ra hesîra mevarne  
Eşqê mi to rê kare bone

*30.12.2012/Gadiza*

## XIZIR HEVAL BONE

Mi çim û birûyê to nêdî  
Çênê a çîta xo berz ke  
Mi va na zerya xo to dî  
Çênê a çîta xo berz ke

To adir verda zerê mi  
Şaş û bêheşo serê mi  
Veşeno, çîn o çarê mi  
Çênê a çîta xo berz ke

Ti roştîya aşma zerrî ya  
Ti gula zerê derî ya  
Ti veyva verê berîyan a  
Çênê a çîta xo berz ke

Ti Burhanî rê bibe yare  
Zerya xo tey bike pare  
Xizir heval bone ma rê  
Çênê a çîta xo berz ke

*16.03.2013/Gadiza*

## BÊTO DÎNA MI TARÎYA

Baxçê de ju gula dewe  
Tede şewle dana kewe  
Hewn nêkuno çimê mi şewe  
Bêto dîna mi tarîya

Ez maşiqê gula rinde  
Meşo zerê mi de vinde  
Îstîrî nêvindenê çiman de  
Bêto dîna mi tarîya

Destê xo bîrina mi ra ke  
Defê melemê pira ke  
Bije zerya mi cira ke  
Bêto dîna mi tarîya

Çimê Burhanî raya to der o  
Bîyo xêx boxê to ra wo  
Serxoş o, boya to ra wo  
Bêto dîna mi tarîya

06.04.2013/Gadiza

## TO RA NÊVANO

Ti şerabê hezar serra  
Şimeno to ra mird nêbeno  
Ez veng dano, lalo keno  
Mireno to ra nêvano

Koyê ma de gula sûr a  
Honik-honik êna, sur a  
Sorbelaş de axwa gurr a  
Şimeno to ra nêvêreno

Şewle dana kela ser ra  
Roştî cênê dewê cêra  
Por xelek a, gerdan zer a  
Helîno to ra nêvêreno

Ware de bê serê îni  
Ma bivîne cênê-cini  
Destê xo bide Burhanî  
Mireno to ra nêvano

*05.07.2014/Gadiza*

## HEWN ÇIMANÊ MI NÊKUNO

Ewro çendo ama dewe  
Hewn nêkuno çimanê mi  
Bê meymana mi be şewe  
Hewn nêkuno çimanê mi

Zerê mi gîrîno, har o  
Dormê mi kemer o, dar o  
Ez derdê xo rê waneno  
Hewn nêkuno çimanê mi

Nêvejîna zerê mi ra  
Êna-şona verê mi ra  
Mij cêreno serê mi ra  
Hewn nêkuno çimanê mi

Zerê mi de ax û derdê  
Poro sîya çima ser de  
Vay dana xo Burhanî ver de  
Hewn nêkuno çimanê mi

06.12.2014/Gadiza

## AXA MI

Axa mi to kena kore  
Ti xo hênî tenik tade-vay de  
Bena raşte zulm û zore  
Ti xo hênî tade-vay de

Heqbê derda pîšta min a  
Ti zê kulî nîšta mi ra  
Saya serê roştîya min a  
Ti xo hênî tade-vay de

Ax û wax ke, zar be çênê  
Ti kî zê mi qar be çênê  
Şo welê rê yar be çênê  
Ti xo hênî tade-vay de

Burhanî emir da raya to de  
Ti kerda gul çarna xo de  
Dano serê xo ra ko de  
Ti xo hênî tade-vay de

12.12.2014/Gadiza



## BOYA WELATÎ

Gula serê Koyê Bîngolî  
To ra boya welatî êna  
Axwa îniyê Estenbolî  
To ra boya welatî êna

Çimanê xo meremnê mi ra  
Ez roştîye bijerî ci ra  
Ruyê xo bikerî pira  
To ra boya dewe êna

Ti welat ra ama lê mi  
Ti kê qar oncena zê mi  
Bê veyve be şîme çê mi  
To ra boya welatî êna

Burhan maşiqê to yare  
Ez bilbilê serê dare  
Ti zê gula verê vare  
To ra boya dewe êna

12.12.2014/Gadiza

## ZERÊ MI VEŞENO

Çimê mi çimanê to ra cêrenê  
Zerê mi veşeno adirê to de  
Sewda bare min a, xo ra vêreno  
Zerê mi veşeno adirê to de

Ma soz da jubînî verê dara de  
Qelbê ma veşeno zere vare de  
Serê zerya mi de gula arê de  
Zerê mi veşeno adirê to de

Destê xo bide mi ma şîme pîya  
Xizir ma pêresno, mekeru cîya  
Burhanî ti serê koya de dîya  
Zerê mi veşeno adirê to de

*07.03.2015/Gadiza*

2182



## EZ BÊKES O

Gule bê ma şîme serê îneyê Xizirî  
Ez biberbî dê (ey) ra mirad bijerî  
Na axa xo bê dê kamî ra vajîrî  
Ez bêkes o, mi nîya vileçewt meke

Verê dewa to raşte wo, merg a  
Bejna xezala mi zê dare derg a  
Ti ke hes nêkana mi bide verga  
Ez teyna wo, mi nîya vileçewt meke

Zerê mi vêşeno bîyo zê adir  
Şew û roj berbeno kamaxo qedir  
Miradê ma keno îşala Xizir  
Ez feqîr o mi nîya vileçewt meke

Bî çend serrî Burhan to dime vano  
Devran êno şono naye rind zano  
Ti ke biwazene emrê xo dano  
Ez xerîb o mi nîya vileçewt meke

